



FEDERATA E PINGPONGUT E KOSOVËS
KOSOVO TABLE TENNIS ASSOCIATION

Shtëpia e Sportit, rr. Agim Ramadani nr. 253, kati I, zyra nr. 7, Prishtinë
Tel: +383-44-170-586 / Email: info@fppk.com / ueb: www.fppk.com

RREGULLORE E PUNËS
SË KUVENDIT TË FEDERATËS SË
PINGPONGUT TË KOSOVËS

PRISHTINË 2024

Në Bazë të nenit 19, paragrafi 4, pika 4.1 si dhe neni 7 të Ligjit për sport Nr. 08/L277 , si dhe sipas nenit 15 të Statutit të Federatës së Pingpongut të Kosovës, Kuvendi i Federatës së Pingpongut, në mbledhjen e datës: 14/12/2024 miratoi këtë:

RREGULLORE E PUNËS SË KUVENDIT TË FEDERATËS SË PINGPONGUT TË KOSOVËS

Neni 1 Qëllimi

Me këtë Rregullore, përcaktohet mënyra e punës, rregullat dhe procedurat e punës së Kuvendit të Federatës së Pingpongut si dhe të drejtat dhe përgjegjësitë e anëtarëve të Kuvendit.

Neni 2 Fushëveprimi

Dispozitat e kësaj Rregullore janë të detyrueshme për të gjithë anëtarët e Federatës së Pingpongut të Kosovës (në tekstin e mëtejme “anëtarët e FPPK-së”), Kuvendin, Bordin Ekzekutiv si dhe personat tjerë të cilët janë subjekt apo marrin pjesë në mbledhjet e Kuvendit të FPPK-së.

Neni 3 Kuvendi

Kuvendi është organi më i lartë drejtues i FPPK-së, i cili detyrat dhe përgjegjësitë i ka të përcaktuara në nenin 15 të Statutit të Federatës së Pingpongut të Kosovës.

Neni 4 Mbledhjet e Kuvendit

1. Kuvendi kryen punën e tij dhe vendos në mbledhjet e veta.
2. Mbledhjet e Kuvendit mund të jenë të:
 - 2.1. rregullta;
 - 2.2. jashtëzakonshme;
 - 2.3. solemne, dhe
 - 2.4. zgjedhore.
3. Në përputhje me nenin 15 paragrafi 5 të Statutit, Kuvendi mbledhet së paku një herë në vit.
4. Në çdo katër vite mbahet Kuvendi zgjedhor.

5. Mbledhjet e Kuvendit si rregull mbahen me prezencë fizike. Sipas nevojës, për çështje të caktuara Kuvendi mund të vendosë ta mbaj mbledhjen e saj në mënyrë elektronike.

6. Mbledhjet e Kuvendit janë publike.

7. Përgjashtimisht nga paragrafi 6 i këtij neni, Kuvendi mund të vendos që një mbledhje e caktuar të jetë e mbyllur për publikun ose të mbahen pa praninë e përfaqësuesve të mediave.

Neni 5

Thirrja e mbledhjeve

1. Mbledhjet e rregullta, zgjedhore dhe solemne i thërret Kryetari i Federatës. Njoftimi për vendin dhe kohën e takimit dërgohet në përputhje me nenin 15 paragrafi 7 të Statutit.

2. Mbledhja për Kuvendin e jashtëzakonshëm mund të thirret nga Bordi Ekzekutiv në përputhje me nenin 15 paragrafi 20, 21 dhe 22 të Statutit. Kërkesa me shkrim duhet të përmbaj çështjen dhe arsyeshmërinë për mbledhjen e jashtëzakonshme.

3. Kryetari i FPPK-së udhëheq mbledhjet e Kuvendit.

Neni 6

Njoftimi për mbledhje

1. Njoftimi për mbledhje, detajet për vendin, kohën dhe pikat e rendit të ditës së bashku me materialin për shqyrtim, dërgohen përmes postës ose email tek:

- 1.1. Secili anëtar i FPPK-së;
- 1.2. Secili anëtar i Bordit Ekzekutiv;
- 1.3. Anëtarët e nderit;
- 1.4. Anëtarët e Komiteteve dhe Komisioneve të FPPK-së;
- 1.5. Përfaqësuesve të Ministrisë përkatëse për Sport;
- 1.6. Përfaqësuesve të Komitetit Olimpik të Kosovës;

.

2. Njoftimi për vendin dhe kohën e mbledhjes dërgohen në përputhje me nenin 15 paragrafi 7 dhe 8 të Statutit.

3. Lidhur me mbledhje ne jashtëzakonshme duhet të plotësohet procedura e paraparë në nenin 15 paragrafi 20 i statutit.

Neni 7

Procedura

1. Agjenda e mbledhjes së Kuvendit përmban:

- 1.1. Verifikimin e të pranishmëve;
- 1.2. caktimin e procesmbajtësit;
- 1.3. procesverbalin e mbledhjes së kaluar të Kuvendit të FPPK-së;
- 1.4. shqyrtimin e aplikimeve për anëtarësim;

- 1.5. shqyrtimin e raportit të përgjithshëm vjetor, duke përfshirë raportet e Bordit Ekzekutiv;
- 1.6. shqyrtimin e raporteve nga komitetet dhe komisionet e FPPK-së;
- 1.7. shqyrtimin e raportit financiar, raportit të auditimit;
- 1.8. shqyrtimin e buxhetit të vitit paraprak dhe shqyrtimi i propozim buxhetit për vitin kalendarik;
- 1.9. shqyrtimin e projekt akteve juridike të FPPK-së;
- 1.10. shqyrtimin e nominimeve për pozita përkatëse në FPPK;
- 1.11. shqyrtimi i propozimeve përcaktimit të datë për mbledhjen e radhës të Kuvendit;
- 1.12. çështje të tjera.

2. Anëtarët e FPPK-së, kanë të drejtën e propozimit të pikave shtesë për mbledhjen e Kuvendit të ftuar jo më vonë se 15 ditë para datës së mbledhjes së Kuvendit. Propozimi duhet të jetë me shkrim dhe përmbaj një arsyeshmëri i cili dërgohet tek Sekretari i Përgjithshëm. Anëtarët e Kuvendit, në fillim të mbledhjes vendosin për përfshirje apo jo të propozimit të anëtarit në agjendën e mbledhjes së Kuvendit.

3. Një folës ka të drejtën që njëherë të flasë për një propozim ose një çështje të cilën e propozon. Përrjashtim mund të bëhet në rastin kur kërkohet replika apo përgjigje për një çështje. Kryetari mund të lejoj një folës të flasë më shumë se një herë varësisht nga situata.

4. Kryetari vendos kujt ti jepet fjala për një propozim apo pikë të rendit të ditës.

5. Pas përfundimit të diskutimeve për çdo pike të rendit të ditës, Kuvendi merr vendim për çështjen.

6. Votimi, përveç në zgjedhje, do të bëhet me një ngritje dore apo me pajisje elektronike ose me votim të fshehtë, siç vendoset nga Kuvendi me një propozim nga Kryetari i Kuvendit;

7. Në rastet e votimit të fshehtë, tre (3) delegat do të emërohen, për miratim nga Kuvendi, për të vepruar në cilësinë e komisionit verifikues;

Neni 8

Kuorumi dhe vendimmarrja

1. Kuvendi mbahet nëse verifikohet se ekziston një kuorum prej më shumë se gjysma (1/2) e delegatëve të pranishëm me të drejtë përfaqësimi dhe me të drejtë vote.
2. Çdo Anëtar i regjistruar në FPPK me certifikatë përkatëse të OJQ-së dhe i cili ka përfunduar garat ekipore me ekipin bazë në vitin paraprak (i përfaqësuar përmes delegatit të emëruar në Kuvend) e ka të drejtën e një (1) vote në Kuvend.
3. Votimi mund të iniciohet nëse verifikohet prezenca e shumicës së delegatëve 50% +1 me të drejtë vote.

4. Vendimmarrja për tu zgjedhur në cilëndo pozitë të organeve në Kuvend, për ndryshimet përkatëse në Statut si dhe shpërbërjen e FPPK-së përcaktohet në përputhje me nenin 15 paragrafin 12 dhe 13 të Statutit.

4. Mënyra e votimit dhe aspektet tjera të votimit përcaktohen në nenin 15 të Statutit.

Neni 9

Procesverbali

Në përputhje me nenin 7 paragrafi 1.2. të kësaj rregullore, për tërë rrjedhën e mbledhjes së Kuvendit mbahet procesverbali, të cilin e nënshkruan kryetari ose kryesuesi i mbledhjes së Kuvendit dhe procesmbajtësi.

Neni 10

Të drejtat dhe përgjegjësitë e anëtarëve të Kuvendit

1. Çdo anëtarë ka të drejtë të marrë pjesë në Kuvend apo të caktoj një përfaqësues në përputhje me nenin 15 paragrafi 3 të Statutit.

2. Anëtarët e FPPK-së, janë të obliguar të marrin pjesë në mbledhjet e Kuvendit.

3. Zgjedhja në cilindo organ të apo pozitë të FPPK-së është e përcaktuar në Statut.

Neni 11

Të drejtat dhe përgjegjësitë e Kryetarit

1. Të drejtat dhe përgjegjësitë e Kryetarit të FPPK-së përcaktohen në Statut.

2. Kryetari nënshkruan aktet e përgjithshme të cilat i miraton Kuvendi.

Neni 12

Shfuqizimi

Me hyrjen në fuqi të kësaj Rregullore, shfuqizohet Rregullorja e Punës së Kuvendit të Federatës së Pingpongut e vitit 2022

Neni 13

Aplikimi i dispozitave të Statutit

Dispozitat e kësaj Rregullore zbatohen në pajtim me dispozitat e Statutit të Federatës së Pingpongut.

Neni 14

Hyrja në fuqi

Kjo Rregullore hyn në fuqi, shtatë (7) ditë pas nënshkrimit nga Kryetari i Federatës së Pingpongut të Kosovës dhe publikimit në faqen zyrtare të FPPK-së.

Nehat Çitaku
Kryetari i FPPK-së

